



## Lu Balluttaggiu

Si ni vannu finarmenti / a la casa li Cummissari  
 e ccu iddri si ni vannu / certi stori dunci e amari.  
 Torna arrieri la Pulitica / di li vasati e abbrazzi  
 a Sinnacu di lu paisi / si candidaru du carcarazzi.

Una è signurineddra / abbirsata, simpaticuna  
 Darrieri avi genti di panza / e pulitici cu li c.....  
 l'antru è omu di populu / veru e propriu brualinaru  
 però avi un difittieddru / parla sulu carcararu.

L'intinzioni è di purtari / lu prugressu a nova vita  
 si ni vannu a cuntutu d'iddri / nun canusciennu la zita,  
 ma lu populu scigli / a granni maggiuranza vera  
 chiddu c'avi li supracciglia / cu la forma di pampera.

Ma un tintu cunsigliu / però ci vinni datu  
 megliu curriri sulu / ca malu accumpagnatu,  
 sta cosa ci piacì / si misi un puncu ntesta  
 cussì l'antri ncucchiati / ci ponnu fari a festa.

Passannu pò lu tiempu / si potrà addunari  
 ca cu mangia sulu / si po' anchi affucari  
 è certu miegliu aviri / cumpagnia e cunfortu  
 picchè è facili passari / di la ragioni a lu tortu.

Caniattù li 30 Giugnu 2006

Indice poesie: <http://www.solfano.it/treppiedi/index.html>

Pagina principale: <http://www.solfano.it>